



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKO VIJEĆE**

---

Broj: 01-02-1-2336-4/15

Datum: 30.12. 2015. godine

Na osnovu člana 36. i 37. Zakona o budžetima u Federaciji Bosne i Hercegovine ("Službene novine FBiH", broj: 102/13, 9/14, 13/14 i 8/15) i člana 14. Statuta Općine Tešanj ("Službeni glasnik Općine Tešanj" broj:11/07) Općinsko vijeće Tešanj na svojoj 35. sjednici održanoj dana 29.12.2015.godine, donijelo je

**O D L U K U  
O IZVRŠAVANJU BUDŽETA  
OPĆINE TEŠANJ ZA 2016. GODINU**

**I - OPĆE ODREDBE**

**Član 1.**

Ovom Odlukom se uređuje način izvršavanja Budžeta Općine Tešanj za 2016. godinu (u daljem tekstu: Budžet), upravljanje prihodima i izdacima Budžeta, zaduživanju i davanju garancija iz Budžeta, te prava i obaveze korisnika.

**Član 2.**

Budžet se sastoji od bilansa prihoda, primitaka i finansiranja te rashoda, izdataka i povrata kreditnih sredstava i garancija, sa rasporedom rashoda i izdataka po budžetskim korisnicima.

**II - TRANSPARENTNOST I JAVNOST BUDŽETA**

**Član 3.**

Budžet je iskazan po funkcionalnoj, fondovskoj, organizacionoj i ekonomskoj klasifikaciji (po kategorijama, podkategorijama i stavkama).

Budžet Općine Tešanj i izvještaji o izvršenju Budžeta za 2016. godinu će se objaviti u „Službenom glasniku Općine Tešanj“ i na zvaničnoj internet stranici Općine.

**III – RAČUNOVODSTVO I KONTROLA BUDŽETA**

**Član 4.**

Odgovorna osoba za izvršenje Budžeta u cjelini je Općinski načelnik, a ovlaštene osobe navedene u ovoj Odluci i drugim aktima (pomoćnici Općinskog načelnika i nosioci aktivnosti - programa) su pomoćni izvršioci i odgovorni su za namjensku upotrebu sredstava Budžeta.

Nadzor nad zakonitošću transakcija i računovodstvenih dokumenata prihoda i izdataka Budžeta vrši službenik za računovodstvo u Službi za finansije, privredu, komunalne i inspekcije poslove.

Služba za finansije, privredu, komunalne i inspekcije poslove je obavezna podnositi izvještaj o izvršavanju Budžeta Općinskom načelniku, a Općinski načelnik Općinskom vijeću.

## **IV - IZVRŠAVANJE BUDŽETA**

### **Član 5.**

Sredstva Budžeta osiguravaju se budžetskim korisnicima koji su navedeni u posebnom dijelu Budžeta sa utvrđenim pojedinačnim pozicijama.

Korisnici budžeta koriste budžetska sredstva samo za namjene koje su određene Budžetom i to do visine utvrđene na pojedinačnim pozicijama.

### **Član 6.**

Služba za finansije, privredu, komunalne i inspeksijske poslove vrši alokaciju sredstava po općinskim službama, koje su potom odgovorne za njihov namjenski utrošak. Budžet se realizuje putem odobrenih operativnih budžeta koji se formiraju prema dinamici realizacije odobrenih aktivnosti i planu novčanih tokova kojim se obuhvataju sve uplate i isplate sa jedinstvenog računa Općine.

Korisnici budžeta koriste budžetska sredstva u skladu sa operativnim planom i odobrenim programima, uzimajući u obzir utvrđenu dinamiku priliva i odliva sredstava.

Nadzor nad raspoloživim sredstvima za plaćanje u skladu sa uputama Općinskog načelnika i Budžetom vrši službenik za finansije u Službi za finansije, privredu, komunalne i inspeksijske poslove.

O utrošenim sredstvima korisnici izvještavaju Odjeljenje za finansije i resorne općinske službe.

Služba za finansije, privredu, komunalne i inspeksijske poslove prati izvršenje operativnih budžeta i vrši izradu periodičnih i godišnjeg izvještaja. U slučaju umanjenja prihoda ili značajnijih promjena na strani rashoda Služba predlaže privremene obustave od izvršenja pojedinih rashoda, te ukoliko je to neophodno izmjene i dopune budžeta koje se donose po utvrđenoj budžetskoj proceduri.

### **Član 7.**

Postupak nabavke roba, investicijskih dobara, ustupanja radova i vršenje usluga mora se obavljati u skladu sa važećim propisima o javnim nabavkama, za što je u ime Općinskog načelnika odgovoran Službenih za javne nabavke i nosilac aktivnosti. Realizacija nabavki će se vršiti u skladu sa planom javnih nabavki koji će se objaviti na zvaničnoj internet stranici Općine.

### **Član 8.**

Općinski načelnik, na prijedlog Službe za finansije, privredu, komunalne i inspeksijske poslove, može vršiti preraspodjelu sredstava između pojedinih korisnika radi finansiranja nedovoljno predviđenih rashoda i izdatka. To prestrukturiranje može iznositi maksimalno 10% planiranih sredstava korisnika.

Služba za finansije, privredu, komunalne i inspeksijske poslove može, na zahtjev budžetskog korisnika, vršiti prestrukturiranje (preraspodjelu) sredstava unutar stavki rashoda odobrenih za pojedinog korisnika - organa uprave. Ukupno prestrukturiranje može se vršiti do 10% sredstava predviđenih za korisnika - organ uprave.

Više ostvareni prihodi i primici koji se ne utroše u tekućoj godini prenose se u cijelosti i predstavljaju prihod Budžeta za narednu godinu. Neutrošena sredstva u okviru planiranog nivoa budžeta, takođe, se prenose u cijelosti, a koriste se prvenstveno za realizaciju planiranih i ugovorenih a ne realizovanih aktivnosti u tekućem Budžetu.

### **Član 9.**

Budžet će se izvršavati po slijedećim prioritetima:

- povrat sredstava finansiranja,
- transferi za jednokratne novčane pomoći,
- plaće i naknade vijećnika i zaposlenika,
- izdaci za materijal, energiju i usluge,
- transferi mjesnim zajednicama,
- tekući transferi i kapitalna ulaganja,
- ostalo.

#### **Član 10.**

O korištenju sredstava Operativne budžetske rezerve odlučuje Općinski načelnik na prijedlog Službe za finansije, privredu, komunalne i inspeksijske poslove. Služba za finansije, privredu, komunalne i inspeksijske poslove prijedloge za dodjelu sredstava operativne budžetske rezerve sačinjava isključivo po zahtjevima budžetskih korisnika (resornih službi) koje su dužne iste obrazložiti u okviru obrasca zahtjeva za korištenje operativne budžetske rezerve.

Općinski načelnik je obavezan polugodišnje izvještavati Općinsko vijeće o raspolaganju - utrošku sredstava rezerve.

#### **Član 11.**

Ako se tokom godine, na osnovu zakona i drugih propisa, poveća djelokrug ili nadležnost korisnika što zahtijeva i povećana sredstva ili se osnuje novi korisnik, sredstva za njegove troškove osiguravaju se iz Operativne budžetske rezerve, a odobrava ih Općinski načelnik.

Ako se tokom godine, na osnovu zakona i drugog propisa, umanjí djelokrug ili nadležnost korisnika, što zahtijeva smanjena sredstva, ili se korisnik ukine, neutrošena sredstva za njegove izdatke prenose se na korisnika koji preuzme njegove poslove uz odobrenje Općinskog načelnika.

#### **Član 12.**

Prikupljanje javnih prihoda i obavljanje platnih transakcija vrši se preko jedinstvenog računa Općine i blagajne Budžeta Općine.

Potpisnici naloga platnih transakcija putem računa iz stava 1. ovog člana su lica koja ovlašćuje Općinski načelnik.

#### **Član 13.**

Pogrešno ili više uplaćeni prihodi u Budžet, vraćaju se uplatiocima na teret tih prihoda ili stavke rashoda "Povrat poreza, izvršenja po presudama, prinudna izvršenja i sporazumna rješenja" ukoliko su isti uplaćeni u prethodnim godinama.

Rješenje o tome donosi Služba za finansije, privredu, komunalne i inspeksijske poslove po ovlaštenju Općinskog načelnika.

#### **Član 14.**

Sredstva na pozicijama "Sredstva za deminiranje i trajno obilježavanje minskih polja" i "Program zaštite od prirodnih nesreća (obuka, rad Štaba CZ, izrada Plana zaštite i dr.)" realizovat će se na osnovu planova koje će sačiniti Služba civilne zaštite, odnosno općinski koordinator za deminiranje, a odobriti Štab civilne zaštite, odnosno Općinski načelnik.

Sredstva na poziciji "Ostale komunalne usluge" realizuju se kroz Program komunalne higijene za 2015. godinu.

Sredstva na pozicijama "Ostale komunalne usluge - sanacija javne rasvjete i svjetlećih znakova", "Održavanje autobuskih stajališta, dječijih igrališta, oglasnih tabli, zaštitnih ograda i spomen obilježja", "Zimsko održavanje puteva prema usvojenom Programu (mreža lokalnih puteva Općine)", "Održavanje i sanacija makadamskih puteva, propusta i priključaka", "Održavanje asfaltnih puteva i ulica, horizontalne i vertikalne signalizacije" i "Uređenje taksi stajališta iz namjenskih sredstava" realizovat će se na osnovu programa i planova koje će sačiniti Služba za finansije, privredu, komunalne i inspeksijske poslove, a odobriti Općinski načelnik.

Sredstva na poziciji "Zimsko održavanje puteva prema usvojenom Programu (mreža lokalnih puteva Općine) putem mjesnih zajednica prema pojedinačnim sporazumima" doznačavat će se mjesnim zajednicama u skladu sa pojedinačnim sporazumima koji će za tu namjenu biti zaključeni.

Sredstva na poziciji "Podrška projektima prema usvojenoj Strategiji - tekuće aktivnosti" realizovat će se na osnovu plana aktivnosti i realizacije pojedinih ciljeva iz Strategije po odobrenju Općinskog načelnika.

### **Član 15.**

Sredstva na poziciji "Grantovi mjesnim zajednicama za redovnu djelatnost" doznavačavaju se mjesnim zajednicama jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika. Raspodjela se vrši prema važećoj Odluci o načinu i kriterijima raspodjele sredstava za finansiranje rada organa mjesnih zajednica, a u izuzetnim slučajevima na osnovu pojedinačnih zahtjeva. Iz ove stavke se finansira rad knjigovodstvenog servisa za potrebe mjesnih zajednica.

U slučajevima kada se vrši obustava sredstava za mjesne zajednice po bilo kom osnovu navedenom u članu 6. Odluke o načinu i kriterijima raspodjele sredstava za finansiranje rada organa mjesnih zajednica (Službeni glasnik Općine Tešanj", broj: 11/07 i 03/11), sredstva koja su tom prilikom obustavljena neće se retroaktivno isplaćivati mjesnoj zajednici, nego će se po otklanjanju nepravilnosti nastaviti finansiranje rada od narednog mjeseca.

### **Član 16.**

Sredstva podgrupe "Grantovi socijalne zaštite i pomoći" u principu doznavačavaju se naznačenim korisnicima budžetskih sredstava (ustanove i udruženja) jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika. Služba za boračko-invalidsku zaštitu će posebnim aktom definisati bliži način transferisanja sredstava koja se izuzimaju od navedenog principa.

Sredstva za koja nisu naznačeni korisnici će se realizovati putem pojedinačnih zahtjeva, te prijedloga i programa koje, na prijedlog općinskih službi, odobrava Općinski načelnik.

### **Član 17.**

Sredstva na stavci "Grant Centru za kulturu i obrazovanje Tešanj (redovna djelatnost i održavanje zgrade)" doznavačavaju se Ustanovi jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

Sredstva na stavkama "Grant Muzeju Tešanj " i "Grant Općoj biblioteci Tešanj za nabavku knjiga i druge potrebe" doznavačavaju se naznačenim korisnicima kvartalno ili po osnovu pojedinačnih zahtjeva.

Sredstva na pozicijama za koja nisu naznačeni direktni korisnici: "Grantovi osnovnim školama (tekuće potrebe)", "Grantovi srednjim školama (tekuće potrebe)" i "Grant predškolskim ustanovama - dječije igraonice" raspoređuju se prema pojedinačnim zahtjevima.

Sredstva na poziciji "Grantovi za projekte mladih i za mlade i podrška projektu Omladinska banka" raspoređuju se po prijedlogu raspodjele Službe za boračko-invalidsku zaštitu i opću upravu koji će biti sačinjen na osnovu kandidovanih programa udruženja građana, osnovnih i srednjih škola, i drugih ustanova, te mjesnih zajednica (izuzev učešća u projektu Omladinska banka) i na osnovu pojedinačnih zahtjeva.

Sredstva na pozicijama "Grantovi za obilježavanje jubileja, značajnih datuma Općine, kulturne i vjerske manifestacije i slično" raspoređuju se na osnovu planova i programa koji će biti sačinjeni od strane Službe za društvene djelatnosti i investicije i finansiranjem pojedinačnih projekata i zahtjeva.

Sredstva na poziciji "Studentske stipendije" raspoređuju se redovnim studentima kojima je, putem konkursa, dodijeljena općinska stipendija.

Sredstva na poziciji "Sredstva za stipendije studentima boračkih populacija iz sredstava Budžeta ZE-DO kantona" realizovat će se doznakama redovnim studentima kojima je, putem konkursa, dodijeljena kantonalna stipendija, odmah po doznaci sredstava iz Budžeta Kantona.

Sredstva na poziciji "Grant za angažovanje volontera u općinskim ustanovama" raspoređuju se u vidu refundacija dijela sredstava ustanovama koje su izvršile angažman volontera tokom godine, prema istim uslovima koji imaju volonteri u općinskoj administraciji.

Sredstva na poziciji "Grantovi ostalim organizacijama u oblasti kulture" raspoređuju se finansiranjem pojedinačnih projekata organizacija u oblasti kulture, a prema Odluci o kriterijima, načinu i postupku raspodjele sredstava nevladinim organizacijama.

Sredstva na poziciji " Grantovi za sufinansiranje ustanova kulture od općeg značaja i interesa za BiH" realizovat će se u skladu sa potpisanim Memorandumu o razumijevanju.

Sredstva za odobrene planove, programe, zahtjeve i prijedloge navedene u stavu 4., 5. i 9. ovog člana odobrava Općinski načelnik.

#### **Član 18.**

Sredstva na poziciji "Grantovi za rad sportskih klubova" raspoređuju se pojedinačnim klubovima i savezima prema Odluci o kriterijima, načinu i postupku raspodjele sredstava nevladinim organizacijama i u izuzetnim slučajevima na osnovu zahtjeva.

Sredstva na poziciji "Grant za Sportsko-rekreacioni centar i za razvoj sporta" doznacavaju se Sportsko-rekreacionom centru Tešanj jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

#### **Član 19.**

Sredstva na stavci "Grantovi za rad udruženja od posebnog značaja za općinu Tešanj" raspoređit će se posebnom odlukom Općinskog načelnika udruženjima koja su definisana Odlukom Općinskog vijeća.

Sredstva na poziciji "Grantovi ostalim udruženjima građana" raspoređuju se udruženjima građana koja nisu izdvojena kao prioriteta u okviru Budžeta, a prema Odluci o kriterijima, načinu i postupku raspodjele sredstava nevladinim organizacijama uz podnošenje zahtjeva za realizaciju Službi za društvene djelatnosti i investicije i u izuzetnim slučajevima na osnovu pojedinačnih zahtjeva.

#### **Član 20.**

Sredstva na pozicijama "Grant Agenciji za razvoj za bruto plate i naknade", "Grant Agenciji za razvoj za materijalne troškove" i "Grant Turističkoj zajednici za obezbjeđenje prostora za Ured" doznacavaju se navedenim korisnicima jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

Sredstva na poziciji "Grant Agenciji za razvoj za podršku projektima" doznacavaju se Agenciji po pojedinačnim zahtjevima i programima aktivnosti.

Sredstva na poziciji "Grantovi klubovima vijećnika OV-a" doznacavaju se klubovima prema važećoj Odluci Općinskog vijeća.

Sredstva na poziciji "Finansiranje Regionalne ekonomske zajednice Zenica i Saveza općina i gradova FBiH" doznacavaju se kvartalno po usaglašenim obračunima koje ove organizacije dostavljaju.

Sredstva na poziciji "Poticaj za razvoj zanatstva - obrta" doznacavaju se po provođenju odabira korisnika sredstava po upućenom javnom pozivu.

Sredstva na poziciji "Grantovi za razvoj poljoprivrede" raspoređuju se finansiranjem programa novčanih podsticaja za unapređenje poljoprivredne proizvodnje koji svojom odlukom usvaja Općinsko vijeće.

#### **Član 21.**

Stavke izdataka koje se finansiraju iz namjenskih sredstava viših nivoa vlasti, međunarodnih institucija i drugih izvora kao, na primjer, "Podrška projektima i utrošak sredstava kapitalnih grantova viših nivoa vlasti i drugih izvora" nisu limitirane i realizovat će se u zavisnosti od visine obezbijeđenih sredstava u vidu grantova - transfera viših nivoa vlasti, međunarodnih institucija i drugih izvora. Za dodatna doznacena sredstva bit će izvršeno uvećanje budžeta za tekuću godinu.

Sredstva utvrđena na pozicijama "Podrška projektima Evropske komisije i drugih institucija - općinsko učešće" i "Podrška projektima i utrošak sredstava kapitalnih grantova viših nivoa vlasti i drugih izvora" koristit će se za namjene podrške kapitalnim projektima (sufinansiranje) na području Općine u vidu učešća u realizaciji kandidovanih projekata kod donatora ili drugih nivoa vlasti, kao i za utrošak sredstava drugih nivoa vlasti i drugih izvora.

Sredstva utvrđena na poziciji "Opremanje civilne zaštite, jedinica i službi iz sredstava posebne naknade" i "Opremanje vatrogasne jedinice iz sredstava Fonda za vatrogastvo i budžeta" koristit će se na osnovu planova koje će sačiniti Služba civilne zaštite i Štab civilne zaštite, a odobriti Općinski načelnik.

Sredstva utvrđena na poziciji "Utrošak sredstava od koncesija i naknade za korištenje šuma" raspoređuju se u skladu sa Odlukom Vlade ZE-DO kantona o načinu rasporeda i korištenja sredstava prikupljenih po osnovu kontinuirane naknade od koncesionara, te na osnovu važećih propisa o šumama. Ova sredstva će biti raspoređena na mikrolokacije definisane u okviru liste kapitalnih projekata za 2016. godinu.

Sredstva utvrđena na pozicijama "Projekt prikupljanja, odvodnje i prečišćavanja otpadnih voda na području općine Tešanj", "Sredstva za uređenje Starog grada – Gradine Tešanj (projektovanje i izvođenje radova)", "Izrada projektne dokumentacija za sanaciju postojeće deponije komunalnog otpada u Bukvi" i "Uređenje industrijskih zona (Bukva i Glinište)" utrošit će se u skladu sa definisanom namjenom.

#### **Član 22.**

Sredstva na stavkama "Realizacija ranije ugovorenih i prenesenih projekata iz prethodnih godina" predstavljaju već ranije odobrene i ugovorene projekte, a utrošit će se u skladu sa potpisanim ugovorima ili sporazumima iz prethodnih godina.

"Gradnja autobuskih stajališta, zaštitnih ograda i regulacija slivnih rešetki" i "Otkup preuzetog i eksproprisanog zemljišta" utrošit će se na osnovu planova koje će sačiniti nadležne općinske službe, a odobriti Općinski načelnik.

Sredstva utvrđena na poziciji "Vodosnabdijevanje" utrošit će se na planirane projekte koji su podržani od strane lokalnih sredina i nadležnog kantonalnog Ministarstva.

Sredstva koja se odnose na kapitalna ulaganja u Organu uprave na stavkama "Unutarnje i vanjsko uređenje zgrada Općine sa opremom", "Nabavka vozila" i "Informatička i druga oprema i nabavka softvera za Općinu" utrošit će se prema planovima resornih službi koje će odobriti Općinski načelnik.

#### **Član 23.**

Sredstva utvrđena na poziciji "Kapitalna ulaganja" i "Utrošak sredstava GSM licenci" raspoređuju se na osnovu posebne Liste u kojoj će taksativno biti navedeni kapitalni projekti za finansiranje iz Budžeta za 2016. godinu.

Visina sredstava koja se odnose na učešće mjesnih zajednica u kapitalnim projektima i njihov utrošak nisu limitirani planiranim iznosima u Budžetu. Za dodatna doznačena sredstva bit će izvršeno uvećanje Budžeta za tekuću godinu.

Sredstva utvrđena na pozicijama sa ekonomskim kodom 615311 bit će doznačena naznačenim korisnicima budžeta putem granta odmah po sticanju uslova za realizaciju kandidovanih projekata ili će se realizovati od strane nadležnih općinskih službi.

#### **Član 24.**

Odluka kojom se definišu kapitalna ulaganja i svi programi i planovi utroška sredstava navedeni u ovoj Odluci donijet će se u roku od 90 dana od dana usvajanja Budžeta.

#### **Član 25.**

Općinski načelnik će predložiti uravnoteženje Budžeta ako se u toku budžetske godine, zbog izvanrednih i nepredviđenih prilika i potreba, znatnije umanje prihodi ili uvećaju rashodi, a u skladu sa članom 37. Zakona o budžetima u FBiH.

## V - ZADUŽENJE I GARANCIJE

### Član 26.

Općina Tešanj će za 2016. godinu izvršiti povlačenje dijela kreditnih sredstava po Ugovoru sa Ministarstvom finansija Federacije BiH iz sredstava EIB-a, za potrebe realizacije projekta prikupljanja, odvodnje i prečišćavanja otpadnih voda na području općine Tešanj do visine od 2.200.000,00 KM.

Ponovo je planirano za realizaciju kreditno zaduženje kod komercijalne banke u BiH za potrebe uređenja Titove ulice i Ulice 1. marta za dio koji nije realizovan u 2015. godini u visini od 400.000,00 KM.

Iz Budžeta Općine je odobrena garancija za kreditno zaduženje JP Toplana d.d. Tešanj u ukupnoj visini od 600.000,00 KM, čime se Budžet Općine za 2016. godinu opterećuje za rezervaciju u visini od 100.000,00 KM.

## VI – FISKALNA ODGOVORNOST

### Član 27.

Rukovodilac budžetskog korisnika (pomoćnik načelnika i drugi) je odgovoran za:

1. zakonito i namjensko korištenje sredstava i
2. efikasno i uspješno funkcioniranje sistema finansijskog upravljanja i kontrolu u okviru budžetom utvrđenih sredstava.

Rukovodilac je dužan svake godine za prethodnu budžetsku godinu, za period u kojem je obavljao poslove rukovodioca, popuniti izjavu o fiskalnoj odgovornosti.

Izjavu iz stava 2. ovog člana Rukovodilac dostavlja Službi za finansije, privredu, komunalne i inspeksijske poslove koje provjerava njen sadržaj.

Uz izjavu se prilažu i planovi otklanjanja slabosti i nepravilnosti utvrđenih od nadležnih organa, izvještaj o otklonjenim slabostima i nepravilnostima utvrđenim u prethodnoj godini i mišljenje internih revizora (interne kontrole) o sistemu finansijskog upravljanja i kontrola za oblasti koje su bile revidirane u prethodnoj godini.

## VII - ZAVRŠNE ODREDBE

### Član 28.

Ova Odluka stupa na snagu objavljivanjem u "Službenom glasniku Općine Tešanj", a primjenjivat će se na budžetsku 2016. godinu.

#### Dostavljeno:

1. Služba za finansije, privredu, komunalne i inspeksijske poslove
2. Općinsko vijeće
3. a/a

**PREDSJEDAVAJUĆI VIJEĆA**

\_\_\_\_\_  
**Senad N. Subašić, dipl.oec**